

SOGHU AVVISADORE

Songiu, in veridade
nde so meda cuntentu
chi m'èppas tanta cosa annunsiadu,
ch'ida sa realtade
nde fato isperimentu
fin'a nd'ider su tempus cambiadu.
Podet suzzeder puru
ch'in su tempus venturu
sia nessi in s'amore fortunadu.
No cherzo dubbitare
chi no bentsat su nadu a resultare!

No m'apparet istranu
unu cambiamentu;
s'amore est a su tempus simizante:
essende in'uraganu,
si furriat su entu
torrende in bonu in su matessi istante.
Ma si faghet gasie,
chi mudat notte e die
s'amore est che su tempus variante.
In custa circunstanzia
no giuata de nde tennere isperanzia.

No giuat ispettare
unu falsu destinu
c'arrivet e mi trunchet sas cadenas,
menzus sigo a istare
infelice continu
ma no cherzo proare atteras penas.
Hapo tantu suffrida
chi finas cunsumidu
mi l'intendo su samben de sas venas;
eduncas como bramo,
constant'enner amadu coments'amo.

SARDIGNA CARA

Sardigna cara, chie no t'hat bidu
ma solu lumenare ti had'intesu:
ischit chi collocada sese in mesu
de su profundu e largu mare infidu;

ti cret logu desertu e abburridu
da-e sa civiltade postu a tesu,
ma sun persones chi no han xumpresu
cantu s'idea issoro hapet faddidu.

S'istramba e neulada fantasia
lis faghet bider cun ojos bendados
s'amena faccia tua Isula mia;

gasi, sos pregios tuos, oscurados
restan in s'umbra, e solu antipatia
nde tenen'e cuncettos isbagliados.

Ma pruite no chircat custa zente
sa benda da-e s'uju 'e si cazzare ?
E bennere una olta a ti mirare
cun coro bonu e anima cussente ?

No dian prus a tie ingiustamente
cun lezeros cuncettos giudicare;
dian finire pro apprezzare
sas bellas dotes tuas dignamente:

da-e sa zente piena 'e buntade,
de costos e civiles sentimenti
c'hat su primadu in s'ospitalidade;

a sos inzegnos d'hoie e sos portentos
de un'antiga e rara civiltade
chi t'hat lassadu eternos munimentos.

PRIMOS SULCOS

Signore beneighe s'Aurora
ch'illuminare cheret custa die,
in su santu trabagliu 'e sa prim'ora.

Ogni dulce faeddu in bucc'a mie;
dogni suspiru, dogni brama 'e coro
in cust'istante est dedicadu a tie.

O Signore, permiti chi ti adoro,
chi m'incumando 'e si meritu tenzo
no mi neghes sas grascias ch'isploro.

Ischis cun cale isforsu eo sustenzo
sa vida mia e de sos chi m'has dadu
fixos e fixas ch'in domo mantenzo.

Beneighe Signore su sagradu
terrinu ch'Epulone mi hat cunzessu
pro chi bensat pulidu e laoradu.

Deo no hapo saltos in possessu,
po piantare fruttos e buddire
sena pagare a nemos s'interessu:

cando s'annada benit a finire,
su c'hapo ammuntonadu cun suore
mi tuccat a mettade a l'ispartire.

Ma no pro custu mi chenso o Signore,
ne so contro s'anzenu bonu istadu
ca nde ses tue su benefattore.

E si pro zertos unos, dispensadu
has grascias d'ogni creze, eo no crec
d'esser su solu fixu ilmentigadu!

Sempre tale est sa fide chi hapo dec
chi m'assistas o no, no benit mancu
e c'a tardu m'azues no mi-screo.

In sos disignos tuos no ponz'ancu,
ne pro grascias bramadas e no tentas,
ma hoe beneighe mi assumencu !

Mira custas sagradas ferramentas;
custas gallosas fadigadas manos;
custas istrazzuladas bestimentas,

no poden, cuguzende custos ranos
sutta sos primos sulcos, isperare
in sos disignos tuos soberanos

si dispostu no ses de m'azuare !